

غل و خليل

ألدغ ف حرف الغين وبس
بيقوله وسط كلامه خاء
طيب وقرب منه قال
طيبتك بتروي ف قلبي خل
فرح الغبي إنه التقى
الخل مش داري المرض
خله صديق اللي إعترف
أنه شايله ف قلبه غل
والطيبين دول عميانين
عن كل شر
بيشوفوا ألوان الصفار
ف الإبتسام

أبيض وناصع بالأوي
وبيضحكوا من قلبهم
ويشموا ريحة الضحكة فل
ويكذبو على أنفسهم ويصدقوا
لو يوم بتدمع عين بكاهام البصل
إن البكي
من حمل قاسي من الهموم
بيسامحوا عند الإعتذار
مهما يكون حجم الزعل
ويوزعوا فدادين سعادة وإنبساط
وبينسوا أوجاع الغلط
بيجوعوا من نبض الفرح
دايما لإن الغير أهم
في النني عدسة مقعرة
بيشوفوا كل الكون كبير

والطيبة بتخش ف هبل
رغم إن عقل الطيبين
يقدر على شر البشر
لكنهم يبحكموا
القلب دائما ف النزاع
بقينا ماشين فالحياة
طيب عبيط
أو شر سلطانه الذكاء
وأما اللسان جه يتعوج
خلى الخليل تصريف لغل